

Ineqarnermut, Attaveqarnermut Aatsitassanullu Naalakkersuisoq
Landsstyremedlem for Boliger, Infrastruktur og Råstoffer

Inatsisartunut ilaasortaq
Olga Poulsen Berthelsen
/MAANI

Naalakkersuisunut apeqqut: Blok Q, R, S-milu najugaqarfinni qassiusuni, attartortuusut qassit ineqarnermut aalajangersakkanik – peqqussummik aamma nalunaarutinik - naammassinninngitsuuppat? Taakkua attartortut inissiarsuit isaterneqarnerini qanoq pineqassappat? Sumut inissinneqassappat? Kiap oqartussaasup (Nuuk Kommuneata imaluunniit Namminersornerullutik Oqartussat) akisussaaffigissavaat? Inissiarsuit isaterneqarnerat qanoq akeqassava?

20.11.2006

Postboks 909
3900 Nuuk
Oq/tel +299 34 54 00
Fax +299 34 54 10
iap@gh.gl
www.nanoq.gl/iap

Blok Q-mi, R-imi aamma S-imi maanna attartortuusut, attartortitsineranut peqqussummi nalunaarutinilu tassunga atasuni maleruagassanik malinnissimangitsut inatsisitigut inissisimanerat pillugu arlalinnik apeqquteqarputit.

Naalakkersuisut sinnerlugit apeqqutitit matuma kinguliani akissuteqarfigissavakka.

Apeqqut: Blok Q, R, S-milu najugaqarfinni qassiusuni, attartortuusut qassit ineqarnermut aalajangersakkanik – peqqussummik aamma nalunaarutinik - naammassinninngitsuuppat?

Akissut: Blok S-imi attartortut eqqarsaatigalugit ulluni makkunanerpiaq attartortitsisarnermut peqqussummik nalunaarutinillu tassunga atasunik naammassinnissimangitsut amerlassusaat 0-iupput. Blok Q aamma R aatsaat 2008-mi upernaakkut aamma 2009-mi upernaakkut isaterneqartussaapput, taamaattumillu aatsaat taamanikkussamut inissiarsuarni taakkunani attartortut attartornermut isumaqatigiissumminnik malinnissimangitsut qassiunersut ataatsimut allattorneqartussaapput.

Apeqqut: Taakkua attartortut inissiarsuit isaterneqarnerini qanoq pineqassappat?

Akissut: Attartortutut attartornermut isumaqatigiissut malissimangikkaanni, inissiami attartukkami najugaqaannarnissaq pisinnaatitaaffigineqanngilaq, tassalu inissiamit najukkamit anisitaasoqartussaavoq. Tamanna Blok Q-mi, R-imi S-imilu attartortunut atuuppoq, taamatullu aamma Namminersornerullutik Oqartussat kommunillu inissiaataanni attartortunut allanut tamanut atuulluni. Taamaattumik Blok Q-mi, R-imi aamma S-imi attartortut, attartornermut isumaqatigiissutiminnik malinnissimangitsut Namminersornerullutik Oqartussat imaluunniit kommunip inissiaataanni attartortittakkani sumiluunniit najugaqartut pineqartarnerannit allaanerusumik pineqassanngillat.

Apeqquut: Sumut inissineqassappat?

Akissut: Blok Q-mi R-imi aamma S-imi attartortut, attartornermut isumaqatigiissumminnik malinnissimasut allamut inissineqarnissamut pisinnaatitaaffeqarput. Attartortut piginneqatigiilluni inissianut nutaanut uterusunngitsut illoqarfimmi sumut inissineqarnissaminnut annertuumik sunniuteqartinneqareerput imaluunniit sunniuteqartinneqartussaallutik. Kisiannili attartortut piginneqatigiilluni inissianut nutaanut uterusuttut illoqarfimmi sumut inissineqarnissaminnut annertuumik sunniuteqartinneqanngillat, piginneqatigiilluni inissiaatissamik sananeqareernissaanut iserterfigineqariaannangornissaanullu taamaallat inisseeqqiffiusumi najugaqartussaagamik. Kiisalu siuliani taaneqareersutut. Attartortut attartornermut isumaqatigiissumminnik malinnissimannngitsunik ilaqarpata, taakku inissiamik inisseeqqiffiusussamik tunineqarnissamut pisinnaatitaanngillat, akerlianilli inissiamit najukkaminnit anisineqartussaallutik. Kisiannili meeraqarunik inissiamik inisseeqqiffiusussamik neqeroorfigineqassapput.

Apeqquut: Kiap oqartussaasup (Nuuk Kommuneata imaluunniit Namminersornerullutik Oqartussat) taakkua akisussaaffigissavaat?

Akissut: Attartortut 18-ileereersimasut imminnut akisussaaffigipput. Attartortut 18-it inorlugit ukiulinnik meeraqarunik taakku angajoqqaatut aama meeqqaminut akisussaasuupput.

Apeqquut: Inissiarsuit isaterneqarnerat qanoq akeqassava?

Akissut: Inissiarsuit pingasuusut tamarmik isaterneqarnissaasa 12,4 millioner koruunit missaannik akeqarnissaat naatsorsuutigaara.

Tuapannguani sulianut tunngatillugu allanik apeqqutissaqaruit ataatsimeeqatiginarlunga piffissamik isumaqatigiissuteqarsinnaavutit, tassanilu suliassaq pillugu, aammalu attartortut pisinnaatitaaffii pisussaaffiilu ataatsimut nassuiaateqarfigumaarpakka.

Ikinngutinnersumik inuulluaqqusillunga

Jørgen Wæver Johansen